

新元史

第五册

及皇太后三月命帝出鎮雲南置常侍府遙授中書左丞相禿忽魯大司徒斡兒朵中政使尙家奴山北遼陽等路蒙古軍萬戶孛羅翰林侍讀學士教化等並爲常侍中衛親軍都指揮使唐兀兵部尙書賽罕八都魯爲中尉敕陝西四川省臣各一員護送帝至雲南冬十一月帝次延安禿忽魯尙家奴孛羅及武宗舊臣釐日沙不丁哈八兒禿等皆來會教化與禿忽魯等謀曰天下者武宗之天下也太子出鎮雲南本非上意由左右之離間請白其事於行省諸臣使聞之朝廷庶可杜讒人之口不然事且不測遂與數騎馳至陝西行省初阿思

罕爲太師鐵木迭兒奪其位出爲陝西行省左丞相至是教化至卽與平章政事塔察兒行台御史大夫脫思伯中丞脫歡悉發關中兵分道自潼關河中府趨京師已而塔察兒脫歡中悔襲殺阿思罕教化於河中諸臣率數百騎擁帝西行至和林踰金山而北諸王察阿台等聞帝至咸率衆歸附帝與定約束每歲冬居札顏夏居斡羅察山春則命從者耕於野泥之地延祐七年夏四月丙寅皇子妥懽帖木兒生其母爲阿兒廝蘭郡王裔孫罕祿魯氏泰定帝元年夏五月皇后八不沙至自京師二年帝遣使貢文豹五月泰定帝遣察乃來致和

元年秋七月泰定帝崩於上都八月甲午僉知樞密院事燕鐵木兒起兵於大都以帝遠在沙漠乃迎皇弟懷王圖帖木兒於江陵且宣言已遣使迎帝以安衆心復詐稱使者自北方來云周王率諸王兵旦夕至丁巳懷王入京師羣臣請卽大位懷王固讓於帝曰吾兄在北以長以賢當有天下必不得已宜明以予志播告中外九月壬申懷王卽皇帝位改元天厯頒詔於天下曰謹俟大兄之至以遂固讓之心冬十月齊王月魯帖木兒等克上都兩京道路始通於是懷王遣哈歡及撒迪等相繼來迎西北諸王皆同時勸進帝遂發北庭舊臣孛

羅尙家奴哈八兒禿從行諸王察阿台元帥朵烈捏萬戶買驢等皆隨扈逾金山嶺北行省平章政事潑皮武甯王徹徹禿僉樞密院事帖木兒不花相繼至帝命孛羅如京師百姓聞使者至驩呼曰吾天子實自北來矣天厯二年春正月乙丑懷王復遣中書左丞躍里帖木兒來迎乙酉撒迪等覲帝於行在奉懷王命勸進丙戌帝卽位於和林之北是月前翰林學士承旨不答失里以太府太監沙剌班輦金銀幣帛至帝遣撒迪等還京師命之曰曩朕弟喜覽經史邇者得勿廢乎聽政之暇宜親賢士大夫講論古今以知治亂得失卿等至京師

當以朕意諭之二月壬辰宣靖王買奴自京師來覲是月懷王遣使以除日奏帝並從之三月戊午朔車駕次潔堅察罕辛酉中書右丞相燕鐵木兒奉皇帝寶來上御史中丞八卽刺知樞密院事禿兒哈帖木兒等各率其屬以從壬戌造乘輿服御丙寅帝謂中書左丞躍里帖木兒曰朕至上都宗室諸王必皆入覲非尋常朝會比也諸王察阿台亦從朕遠來有司供帳皆宜豫備卿其與中書省議之夏四月癸巳燕鐵木兒入覲於行在率百官奉上皇帝寶以燕鐵木兒爲太師仍兼中書右丞相開府儀同三司上柱國錄軍國重事答刺罕如故

復諭燕鐵木兒等曰凡京師百官朕弟所用者並仍其舊卿等其以朕意諭之是日哈八兒禿爲中書平章政事前中書平章政事伯鐵木兒知樞密院事常侍孛羅爲御史大夫甲午立行樞密院昭武王知樞密院事火沙領行樞密院事賽帖木兒買奴並同知行樞密院事帝燕諸王大臣於行殿燕鐵木兒哈八兒禿伯鐵木兒孛羅等侍帝諭臺臣曰太祖皇帝嘗訓敕臣下云美色名馬人皆悅之然方寸一有繫累卽能壞名敗德卿等居風紀之司亦嘗念及此乎天下國家譬猶一人中書則右手也樞密則左手也左右手有病治之以良醫省

院闕失不以御史臺糾之可乎凡諸王百官違法越禮一聽舉劾風紀重則貪墨懼猶斧斤重則入木深其勢然也朕有闕失卿亦奏聞朕不汝責也乙未命孛羅等傳諭燕鐵木兒伯答沙火沙哈八兒禿八卽刺等曰世祖皇帝立中書省樞密院御史臺及百司共治天下大小職掌已有定制世祖命廷臣撰律令章程以爲萬世法列聖相承罔不恪遵朕今居世祖所居之位凡百司庶政詢謀僉同標譯所奏以告於朕軍務機要樞密院卽奏聞毋以夙夜爲間而稽留之其他必先白中書省樞密院御史台毋得隔越陳請儻違朕命必罰無赦丁

西陝西行台御史大夫鐵木兒脫爲上都留守辛丑懷
王遣使以御史臺除日上癸卯遣使如京師卜日中書
左丞相鐵木兒補化攝告卽位於郊廟社稷立皇弟圖
帖木兒爲皇太子仍置詹事院罷儲慶司徹里帖木兒
爲中書平章政事闊兒吉思爲中書右丞怯來只兒哈
郎並爲甘肅行省平章政事忽刺台爲江浙行省平章
政事那海爲嶺北行省平章政事甲辰敕中書省官吏
送寶者晉秩一等從者賚以幣帛乙巳嶺北行省平章
政事塔卽吉左丞馬謀並坐黨附倒刺沙免官五月丁
巳朔車駕次朵里伯真戊午遣西安王阿剌忒納失里

還京師封帖木兒爲保德郡王己未皇太子遣翰林學士承旨阿鄰帖木兒來覲庚申車駕次斡耳罕水東辛酉御史大夫孛羅中政使尙家奴並加開府儀同三司典四番宿衛癸亥車駕次必忒怯禿翰林學士承旨斡兒朵自京師來覲庚午命燕鐵木兒擢用嶺北行省官吏凡潛邸舊臣及扈從之士受制命者八十有五人六品以下二十有六人壬申車駕次探禿兒海封亦憐眞八爲柳城王八卽刺爲陝西行臺御史大夫衆家奴爲御史中丞乙亥車駕次禿忽刺敕中書省臣鑄皇太子寶己卯翰林學士承旨唐兀加太尉辛巳車駕次斡羅

幹禿壬午次不魯通是日左丞相鐵木兒補化等以帝
卽位攝告南郊甲午車駕次忽刺火失溫六月丁亥朔
車駕次坤都也不刺是日鐵木兒補化等攝告宗廟社
稷庚寅車駕次撒里丁酉次兀納八改都督府爲太都
督府己亥次闊朵辛丑次撒里怯兒壬寅戒近侍毋輒
有奏請丁未車駕次哈兒溫戊申次闊朵傑阿刺倫辛
亥次哈兒哈納土論中書省凡國家錢穀銓選諸政先
啓皇太子然後奏聞癸丑車駕次忽禿七月丙辰朔日
有食之甲子車駕次孛羅火你乙亥次不羅察罕戊寅
次小只壬午中書平章政事哈兒八禿同翰林官祭太

祖太宗睿宗御容八月乙酉朔車駕次王忽察都丙戌
皇太子入覲是日燕皇太子及羣臣於行殿庚寅帝暴
崩年三十葬起輦谷冬十月丙申上尊諡曰翼獻景孝
皇帝廟號明宗國語曰護都篤皇帝至元六年冬十月
己巳上尊號曰順天立道睿文智武大聖孝皇帝
史臣曰燕鐵木兒立文宗文宗固讓於兄猶仁宗之奉
武宗也明宗之弑蓋出於燕鐵木兒非文宗之本意然
與聞乎弑是亦文宗弑之而已

新元史卷之二十一終

本紀卷二十一

新元史卷之二十一

賜進士出身自講起居注官翰林院侍讀國史館纂修膠州柯劭忞撰

文宗上

文宗聖明元孝皇帝諱圖帖睦爾武宗次子也母曰文獻昭聖皇后唐兀氏帝以大德八年正月癸亥生英宗至治元年五月欽察台咬住告脫歡察兒等交結親藩有異志詞連於帝乃出帝居瓊州泰定元年正月召還至潭州復命止之四月自潭州至京師八月賜鈔三千錠十月封懷王食邑端州六萬五千戶賜金印並增歲幣千匹二年正月又出帝居建康以殊祥院使也先捏

領宿衛致和元年三月遣宗正札魯忽赤雍古台遷帝於江陵七月庚午泰定帝崩於上都先是泰定帝將幸上都命西安王阿剌忒納失里留守同僉樞密院事燕鐵木兒留掌樞密符印至是燕鐵木兒聞泰定帝崩密與阿剌忒納失里謀奉帝入承大統八月甲午黎明百官集興聖宮燕鐵木兒率阿剌鐵木兒孛倫赤等十七人露刃宣言於眾曰武宗皇帝有聖子二人天下歸心宜踐大位有不奉命者斬之乃縛平章政事兀伯都剌伯顏察兒分命執中書左丞朶朶參知政事王士熙參議中書省事脫脫吳秉道侍御史鐵木哥邱世傑治書

侍御史脫歡詹事丞王桓等下獄與阿剌忒納失里籍
府庫拘符印召百官入內廷聽命遣大司農卿明里董
阿前宣政使答里麻失里馳駟迎帝於江陵密諭河南
行省平章政事伯顏簡士馬以備扈從是日推前湖廣
行省左丞相別不花爲中書左丞相太子詹事塔失海
牙爲中書平章政事前湖廣行省右丞速速爲中書左
丞前陝西行省參知政事王不憐吉歹爲樞密副使蕭
蒙古歹仍爲通政院使同僉樞密院事燕鐵木兒翰林
學士承旨亦列赤通政院使寒食分典庶務諸人旣受
命未知所謝注目而立燕鐵木兒麾衆使南向拜以帝

在江陵也。衆始喻旨。丁酉。燕鐵木兒復遣撒里不花等來迎。且使塔失鐵木兒矯爲帝使者。自南來言。車駕已次近郊。癸卯。明里董阿等至江陵。甲辰。帝發江陵。召鎮南王鐵木兒不花、威順王寬徹不花、湖廣行省平章政事高昌王鐵木兒補化來會。執湖廣行省左丞馬合某送京師。以別薛代之。乙巳。召陝西行台侍御史馬札兒合行省平章政事探馬赤不至。丁未。河南行省平章政事伯顏爲行省左丞相。庚戌。車駕至汴梁。伯顏等扈從北行。鐵木兒補化爲湖廣行省左丞相。前翰林學士承旨阿里海涯爲河南行省平章政事。辛亥。燕鐵木兒知

樞密院事亦列赤爲御史中丞王子阿速衛指揮使脫
脫木兒率所部自上都來降命守古北口乙卯脫脫木
兒與上都諸王失刺平章政事乃馬台詹事欽察等戰
於宜興敗之獲乃馬台欽察丙辰燕鐵木兒奉法駕郊
迎丁巳帝至京師貴赤衛指揮使脫迭出帥所部自上
都來降命與脫脫木兒同守古北口戊午速速爲中書
平章政事前御史中丞曹立爲中書右丞江浙行省參
知政事張友諒爲中書參知政事河南行省左丞相伯
顏爲御史大夫中書右丞趙世延罷爲御史中丞己未
萬戶也速台兒同知樞密院事殺隆鎮衛指揮使黑漢